

Nunap immikkoortuini mittarfinnik tulleriarinissamut tunngavissat pillugit Inatsisartut aalajangiiffigisassaattut siunnersuut

(Ineqarnermut Attaveqaqatigiinnermullu Naalakkersuisoq)

Saqqummiussissut

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Ataqatigiinnerusumik, ullutsinnut naleqqunnerusumik, pitsaanerumillu silaannakkut angallassisoqartalernissaata ineriartortinneqarnissaa pillugu Naalakkersuisut matumuuna siunnersuuteqarput.

Aalajangiiffigisassatut siunnersuut manna, mittarfiit pillugit siusinnerusukku Inatsisartut aalajangiisimanerinit malitseqartitsineruvoq. Nunap immikkoortortaanni mittarfiliortitsinissami periarfissat massakku pineqarput.

Angalasarnerit innuttaasunut, inuutissarsiutilinnut pisortanullu ajornannginnerulersinneqarnissaannik, isumannaannerunissaannik, pisariinnerunissaannillu Naalakkersuisut anguniagaqarput. Angallasseriaatsip aaqqissuussaanerata pitsaanerulersinneqarnissaannik kissaateqarnermi, sumiiffiit ilaanni aningaasartuutit appartinneqarnissaannut periarfissat, taamaalilluniluni aningasartuutigineqartartut naleqqataannik angallannerusoqarsinnaanissaannut periarfissiinissaq aamma ilaalluinnarput. Tassunga ilanngullugu nassiussinissamut periarfissat pitsaanerulersinneqassapput.

Nutaamik attaveqaqatigiinnermik pilersitsiniarneq sammiveqanngitsumik ineriartortinneqassanngilaq, sumiiffinnili ataasiakkaani aningaasaqarneq, ineriartortitsinissamilu periarfissat eqqarsaatigilluinnarlugit ineriartortinneqassalluni.

Taamaalilluni nunap immikkoortortaanni mittarfissanik tulleriarinissami tunngavissat, nunami sumiiffinni tamani ineriartortitsinissamik Naalakkersuisut akisussaaffinnik tigusinissaminnik kissaateqarnerinik takussutissiipput.

Aningaasaqarnikkut ilungersunartumik inissisimavugut. Taamaattumik eqqarsarluaqqaarluta aningaasat atussavagut. Taamaattumik mittarfippassuit ataatsikkut sanaartorneqannginnissaannik periaasissamik Naalakkersuisut siunnersuuteqarput.

Pingaartumik COVID-19 atuutsillugu mittarfiit tulleriarneqarunik isumatusaarnerusinnaavoq, pingaartumik suliniutit inuiaqatigiit aningaasaqarnerinut pitsanngoriartitsissappata. Eqqaamassavarput suliassaqartitsineruneq, inuiaqatigiit

pitsaanerusemik aningaasaqarnissaannut aqputissaamat. Mittarfinnik sanaartortitsineq taamatut siunertaqarnermut tapertaalluinnarpoq.

Misissueqqissaarnerni inerniliussat tamarmik isumalluarnanngitsut ersarilluinnarpoq. Taamaattumik Naalakkersuisut isumaqarput, pissutsit immikkut illuinnartut aalajangiisuunngippata inuiaqatigiit aningaasaqarnerinut annaasaqaataasussaallutik suliniutit aallartinneqassanngitsut, immikkoortortanilu allani sanaartortitsinissami suliassat akigalugit tulleriarinissaminnut kajumissuseqassasut. Pissutsit immikkut illuinnartut assersuutigalugu tassaasinnaapput inuutissarsiutilinnut takornarialerisunullu ineriartortitsinissamik sunniutissallit, minnerunngitsumillu innuttaasut ataasiakkaat angalanerminni allaanerusemik ataqatigiinnermik misigitinneqarnissaat, taamaalillunilu niuermik tunngaveqarluni timmisartuussinerni, nassiussassanik nassiussinissani, peqqinnissakkullu sullinneqarnertigut atugassarititaasut pitsaanerulersinneqarlutik.

Taamatut oqaaseqarlunga siunnersuut Inatsisartuni kajumittumik suliassanngortippara.